

**A C T A 2/2019**  
**SESIÓN ORDINARIA PLENO MUNICIPAL**  
**- 27 DE FEBREIRO DE 2019 -**

Na Casa do Concello, a vinte e sete de febreiro de dous mil dezanove, reúnense en primeira convocatoria os/as señores/as concelleiros/as que se relacionan a continuación, baixo a presidencia do sr. alcalde, D. Rafael C. Sisto Edreira, co obxecto de celebrar a sesión ordinaria correspondente ao día da data, para a que foron debidamente convocados/as.

**ASISTENTES:**

**Alcalde:**

D. Rafael Carlos Sisto Edreira

**Concelleiros/as:**

D. Xosé Ignacio Iglesias Villar  
D.<sup>a</sup> Concepción García Vázquez  
D. Jorge Juan Carballido Salgado  
D.<sup>a</sup> María del Pilar Pérez Fagil  
D. José Francisco Nanín Castro  
D. José Manuel Guerra Calvelo  
D. Antonio Reyes Sánchez Crespo  
D.<sup>a</sup> Sofía Ferreiro Gaspar  
D. Julio César Retis Vázquez  
D.<sup>a</sup> María Vázquez Rey  
D. Ignacio Manuel Arroyo Font  
D.<sup>a</sup> María Dolores Nariño Facal  
D.<sup>a</sup> Uxía Lemus de la Iglesia  
D. Roberto Moñino Gil  
D. Manuel Anxo Fernández Baz

**Non asiste, previa escusa:**

D. Xurxo Francos Liñares

**Secretaría xeral:**

D.<sup>a</sup> Virginia Fraga Díaz

**ORDE DO DÍA:**

- 1.- APROBACIÓN DA ACTA DA SESIÓN DO 30.01.19**
- 2.- DAR CONTA DAS RESOLUCIÓNS DA ALCALDÍA (DA 42/19 Á 150/19)**
- 3.- DAR CONTA DO INFORME DO CUMPRIMENTO DOS PRAZOS DE PAGO DAS OPERACIÓNS COMERCIAIS, 4º TRIMESTRE 2018**
- 4.- DITAME DA MOCIÓN DOS GRUPOS MUNICIPAIS DE SONDETEO-ANOVA E PSdeG-PSOE SOBRE O APOIO ÁS MOBILIZACIÓNS DO 8 DE MARZO**
- 5.- DITAME DA MOCIÓN CONXUNTA DE ANOVA-SON DE TEO, PSdeG-PSOE E BNG PARA O REXEITAMENTO DA CAMPAÑA DIRIXIDA AO ALUMNADO SOBRE MINERÍA SOSTIBLE**
- 6.- PROPOSICIÓN DA ALCALDÍA SOBRE A OBRA COLECTOR ESPASANDE-A INSÚA: APROBACIÓN DE PROXECTO MODIFICADO E DE EXPEDIENTE DE MODIFICACIÓN DO CONTRATO**
- 7.- MOCIÓNS**
- 8.- ROGOS E PREGUNTAS**

Co quórum establecido polas disposicións legais vixentes para a válida constitución do Pleno, o sr. alcalde, sendo as vinte horas, declara público e aberto o acto, pasando a tratar os asuntos incluídos na orde do día que figura na convocatoria, que son os seguintes:

**1.- APROBACIÓN DA ACTA DA SESIÓN DO 30.01.19.**

O sr. alcalde pregúntalle aos/ás sres/as. concelleiros/as se desexan formular algunha observación á acta da sesión ordinaria celebrada o 31 de xaneiro de 2019.

Non habendo observacións ao respecto, queda aprobada a acta citada.

## **2.- DAR CONTA DAS RESOLUCIÓN S DA ALCALDÍA (DA 42/19 Á 150/19).**

Dáse conta das Resolucións da Alcaldía ditadas dende o día 25 de xaneiro ata o 21 de febreiro de 2019, que comprenden os números 42 ao 150, indicando o sr. alcalde que están a disposición de todos os membros da Corporación para a súa consulta se así o desexan.

O Pleno da Corporación dáse por enterado.

## **3.- DAR CONTA DO INFORME DO CUMPRIMENTO DOS PRAZOS DE PAGO DAS OPERACIÓN S COMERCIAIS, 4º TRIMESTRE 2018.**

O sr. alcalde da conta do informe de Tesourería e Intervención, de 4 de xaneiro de 2019, sobre o cumprimento dos prazos de pago das operacións comerciais, do 4º trimestre do 2018.

O Pleno da Corporación dáse por enterado.

## **4.- DITAME DA MOCIÓN DOS GRUPOS MUNICIPAIS DE SONDETEO-ANOVA E PSdeG-PSOE SOBRE O APOIO ÁS MOBILIZACIÓN S DO 8 DE MARZO.**

O sr. alcalde cede a palabra ao concelleiro dos servizos de benestar social e igualdade e participación veciñal, D. Xosé Ignacio Iglesias Villar.

O sr. Iglesias da conta da moción do grupo municipal de SondeTeo-ANOVA e PSdeG-PSOE (rex. entrada nº 1084, do 15/02/2019), que se recolle a continuación, ditaminada favorablemente pola Comisión Informativa de benestar social, igualdade, participación veciñal e mocidade de 21 de febreiro de 2019.

*“MOCIÓN DO GRUPO DE MUNICIPAL DE SONDETEO-ANOVA, PdG-PSOE SOBRE O APOIO AS MOBILIZACIÓN S DO 8 DE MARZO*

### *Exposición de motivos*

*Ás violencias machistas cotiás están no presente da nosa sociedade a través de 1.000 asasinatos de mulleres en pouco máis de 14 anos só no Estado español. As desigualdades continúan estando presentes na nosa sociedade como en anos pasados, e son o motor da peor das violencias, a que esta implícita no funcionamento do sistema social, económico, laboral e político*

*Neste ano ademais, douse un fenómeno novo, comeza a haber un retroceso político na defensa do territorio gañado para a igualdade. A irrupción de forzas de extrema dereita, apoiándose en pactos de goberno coa dereita, propugna directamente a supresión de leis garantistas para as mulleres. Non tíñamos dado esta volta atrás en democracia.*

*E para rematar o ano, volven a sacar en procesión os dereitos reprodutivos das mulleres. Pero para mal. Volvennos a dicir que hai que repensar a lei do aborto. Agora coa desculpa de loitar contra da despoboación. Con este nivel discursivo podemos chegar a facer realidade a situación da serie “o conto da criada”,*

*Ante isto, acabar coa discriminación entre mulleres e homes, volvese unha carreira de resistencia, que comeza por non perder o ganado. Non hai nada asegurado, pero é un deber ético e un compromiso histórico inaprazable.*

*O 8 de marzo, ten a súa orixe na reivindicación dos dereitos laborais femininos no ano 1908, e que rematou co asasinato de 146 traballadoras do téxtil por pedir salarios dignos. O ano pasado a folga feminista tivo unha repercusión e un seguimento masivo na sociedade española. Este ano non se pensa que poida ser menos. A maioría dos sindicatos están a dar cobertura legal ao próximo 8 de marzo ao paro internacional de mulleres impulsado por numerosas organizacións do movemento feminista en todo o mundo. Por todo elo propoñemos ao Pleno os seguintes ACORDOS:*

- 1.- Apoiar a Folga Xeral das Mulleres, así como as mobilizacións e accións que convoca o movemento feminista para este 8 de Marzo.*
- 2.- O Concello comprometese a facilitar os medios de difusión dispoñibles para dar a coñecer os principais actos da xornada do 8 de marzo. En especial a folga das mulleres.*
- 3.- Incluir nos actos de celebración institucional do 8 de marzo, información sobre o paro feminino do día 8.*
- 4- Non realizar actos institucionais ou actividades o día 8 de marzo que poidan supoñer un entorpecemento ou dificultade para exercer o dereito de folga.*
- 5.- Colocar a bandeira feminista na casa do concello de Teo, e unha pancarta no balcón do concello, como apoio as demandas das organización de mulleres”.*

Aberta a primeira quenda de intervencións, o portavoz do grupo mixto, sr. Fernández, manifesta que vaia por diante o apoio do BNG á moción. Sinala que en todo caso quere aproveitar para manifestar o recoñecemento e apoio ao colectivo galego 8M e á convocatoria de manifestación nacional galega, do día 3 de marzo, e da folga de mulleres do 8 de marzo, así como manifestar a desaprobación da Xunta de Galicia por ter vulnerado o dereito fundamental de folga o pasado 8 de marzo do 2018 e non ter impulsado unha rectificación desas políticas.

Gustaríalle ao sr. Fernández que a Corporación manifestara o seu compromiso contra as ameazas de retrocesos en materia de igualdade, como se acaba de ver con esta moción.

Salienta que para o BNG esa data non é ningún ritual nin nada polo estilo, polo que quere aproveitar para poñer de manifesto unha serie de cifras que hai que ter moi en conta. Sinala que o 22,2% das mulleres en Galiza viviron por debaixo da liña da pobreza no ano 2017, practicamente unha de cada catro, o que é terrible, e case o 60 % das perceptoras da RISGA foron mulleres, datos a ter moi en conta cando se fala de igualdade. No ano 2017 houbo case 100.000 asalariadas que nin sequera chegaban á metade do SMI, 100.000 en Galicia, que é case a poboación de Ourense, a taxa de temporalidade feminina é do 27,5%, dous puntos por riba dos homes, que xa lle chega, case o 95 % de contratos a nomes de mulleres foron temporais e o 49 % dos contratos rexistrados a nome de mulleres duraron menos dun mes no ano 2018 e, tratándose do tipo de xornada, o 47 % dos contratos rexistrados a nome de mulleres no último ano foron a xornada parcial. Salienta o sr. Fernández que un ano despois do 8M o panorama concrétese na reforma laboral sen derogar e nunha Xunta sen impulsar unha soa medida e que vetou constantemente o impulso dunha Valedoría da Igualdade que fiscalice o cumprimento da Lei de igualdade e asesore na materia, como onte se lembrou no Parlamento.

Intervén a portavoz do PSdeG-PSOE, sra. Lemus, quen anuncia o apoio do seu grupo á moción.

Intervén o portavoz do PP, sr. Guerra, quen lle cede a palabra á concelleira do seu grupo D.<sup>a</sup> María Dolores Nariño Facal.

A sra. Nariño di que queren manifestar o apoio do seu grupo neste tipo de actos, e máis en referencia á muller e en materia de violencia de xénero, aínda que queren deixar plasmado que representan a un número grande e maioritario de veciños/as de Teo e neste tipo de cuestións lles gustaría que lles fixeran participes deste tipo de mocións, polo que queren transmitir o seu malestar nese sentido. Sinala a sra. Nariño que é certo que o sr. Iglesias lles trasladou que foi todo moi atropelado porén entenden que neste tipo de cuestións se lles ten que ter en conta.

Os/as concelleiros/as non fan uso da segunda quenda de intervencións.

**Rematado o debate e sometido o asunto a votación, o Pleno da Corporación, por unanimidade dos presentes (6 Son de Teo-ANOVA, 7 PP, 2 PSdeG-PSOE e 1 grupo mixto), acorda:**

- 1.- Apoiar a Folga Xeral das Mulleres, así como as mobilizacións e accións que convoca o movemento feminista para este 8 de Marzo.**
- 2.- O Concello comprométese a facilitar os medios de difusión dispoñibles para dar a coñecer os principais actos da xornada do 8 de marzo. En especial a folga das mulleres.**
- 3.- Incluír nos actos de celebración institucional do 8 de marzo, información sobre o paro feminino do día 8.**
- 4- Non realizar actos institucionais ou actividades o día 8 de marzo que poidan supoñer un entorpecemento ou dificultade para exercer o dereito de folga.**
- 5.- Colocar a bandeira feminista na casa do concello de Teo, e unha pancarta no balcón do concello, como apoio as demandas das organización de mulleres.**

**5.- DITAME DA MOCIÓN CONXUNTA DE ANOVA-SON DE TEO, PSdeG-PSOE E BNG PARA O REXEITAMENTO DA CAMPAÑA DIRIXIDA AO ALUMNADO SOBRE MINERÍA SOSTIBLE.**

O sr. alcalde cede a palabra á concelleira de cultura e educación, D.<sup>a</sup> M<sup>a</sup> del Pilar Pérez Fagil.

A sra. Pérez da conta da moción conxunta de ANOVA-Son de Teo, PSdeG-PSOE e BNG de 15 de febreiro de 2019 (rex. entrada nº 1079), que se recolle a continuación, ditaminada favorablemente pola Comisión Informativa de cultura, educación, seguridade cidadá e deportes de 21 de febreiro de 2019.

### **“MOCIÓN CONXUNTA DE ANOVA-SON DE TEO, PSdG/PSOE E BNG PARA O REXEITAMENTO DA CAMPAÑA DIRIXIDA AO ALUMNADO SOBRE MINERÍA SOSTIBLE**

*O 12 de febreiro, a Xunta de Galicia e a Cámara Oficial Mineira de Galicia presentaron publicamente un conxunto de materiais teoricamente educativos destinados a nenas e nenos de infantil, primaria e secundaria – ademais da campaña de enxeñería social “Minaría Sostible de Galicia” que, segundo se indica, ten como público destinatario o alumnado galego destes niveis educativos.*

*Esta campaña provocou o rexeitamento frontal dos colectivos integrados en ContraMINAcción, do movemento ecoloxista, e en xeral dos movementos sociais organizados en materia medioambiental. Estes colectivos veñen denunciando repetidamente como as administracións miran para outro lado diante do que consideran vulneracións legais das explotacións, e que deixan un regueiro de contaminación e destrución polo país.*

*A administración está a permitir que as empresas se centren en conseguir os rendementos propios dun espolio durante o proceso de produción, facendo deixación de funcións nas súas competencias de control e supervisión medioambiental das explotacións. Cando, por múltiples causas, as empresas deixan as súas actividades, Galicia ten que aturar, e aturará no futuro, as terribles pegadas medioambientais destas explotacións.*

*Desgraciadamente, neste concello e na súa contorna, temos experiencias deste tipo. Os dous grandes problemas medioambientais proceden deste método de explotación, propio do que os imperios desenvolven nas súas colonias. A mina de Touro, que segue dende os anos oitenta botando augas contaminadas ao río Ulla, fonte de auga potable da nosa poboación, e a contorna da canteira da Casalonga, sen medidas de recuperación medioambiental nin controis públicos que determinen o estado real do chan e das augas, son a nosa herdanza do pasado para hoxe e para mañá.*

*Que a Xunta de Galicia se alíe coas empresas do sector e non coa sociedade civil xa di moito de por onde imos. Alguén cre que as empresas que levan anos contaminando o noso país, van gastar os cartos en campañas educativas? Pensamos que é simplemente unha campaña de publicidade e propaganda camuflada como educativa, dirixida a un público cautivo, en horas lectivas, e sen información de contraste.*

*Esta campaña pretende dulcificar e quitarlle importancia os desastrosos impactos da minaría. A percepción social do proxecto de Corcoesto, de Touro, de San Fins, ERIMSA, de Triacastela ou de outros moitos ao longo do país.*



*A confederación ANPAS GALEGAS mostrou a súa oposición a que os sectores máis vulnerables da nosa sociedade, entre os que se atopan as crianzas e adolescentes, teñan que aturar nos centros de ensino, ou en calquera actividade extraescolar, uns audiovisuais perniciosos destinadas a educación infantil, primaria e secundaria que ocultan a grave contaminación, a destrución da paisaxe e do patrimonio. Esta entidade solicitou á Xunta de Galicia que recapacite e non faga uso dese material sesgado e con discutibles visións sobre a minería.*

*Dende a Rede ContraMINAcción indican que non se pode falar de “Minaría sostible”, tendo en conta o actual estado das minas de Touro, San Fins, Monte Neme ou Santa Comba, por citar apenas algúns exemplos, onde a drenaxe ácida de mina ten impacto sobre os sistemas fluviais e marítimos. Existen actualmente investigacións en curso, tanto no Parlamento Europeo como nas Nacións Unidas, sobre os efectos destas explotacións mineiras e o papel ocultador da administración galega.*

*No caso de Monte Neme, baixo o nome de “lago de intenso azul”, “hermosas augas turquesas” ou “paraíso”, estanse a apoiar desde a Xunta de Galicia as “bondades” de balsas tóxicas de residuos mineiros que acumulan gran cantidade de metais pesados e que son froito da minería extractiva e contaminante. Este non é o único exemplo, como ilustran moitos outras casos de degradación ambiental e paisaxística. Por citar algúns, véxanse os casos da Poza de Cartelle, en Ourense, afectada pola drenaxe aceda da minería; a Poza da canteira de Ventoxo, no municipio de Forcarei (Pontevedra); a Poza da canteira de Pedras Miúdas, en Catoira, afectada pola drenaxe ácida da minería; ou a Poza da canteira de Nantón, Cabana de Bergantiños (A Coruña), afectada pola drenaxe ácida da minería. Son só exemplos, xa que en outras moitas canteiras e minas pode estar a suceder o mesmo.*

*O procedemento para a recuperación de espazos durante e despois das explotacións mineiras é case sempre inexistente, e é raro que as empresas non atopen o burato administrativo para evitar investir na restauración, por moito que a legalidade lles obrigue.*

*Por todo isto, propoñemos ó Pleno Municipal a adopción do seguinte*

**ACORDO:**

- *Reclamar da Xunta de Galicia e da Cámara Oficial da Minería de Galicia que retiren a campaña de distribución, nos centros escolares de infantil, primaria e secundaria, dos materiais didácticos denominados “Minería Sostible de Galicia”, por tratarse dunha campaña publicitaria con información incompleta, sesgada e terxiversada.*
- *Reclamar da Xunta de Galicia que examine as explotacións mineiras abandonadas para coñecer os problemas medioambientais que están a producir, e se elabore un plan para poñerlles remedio.*
- *Esixir a Xunta de Galicia que sexa eficaz na súa labor de inspección medioambiental nas explotacións mineiras, e se establezan os controis necesarios para atallar a contaminación en todas as fases do proceso extractivo.*



- *Comunicarlle a Xunta de Galicia, á Cámara oficial da minería de Galicia, e os centros escolares de Teo o contido desta moción”.*

Aberta a primeira quenda de intervencións, o portavoz do grupo mixto, sr. Fernández, sinala que é incrible o que ven de denunciar a confederación das Ampas galegas da proposta da cámara mineira, na que se dulcifica a minería. Sinala que sabe que a minería é necesaria, porén haberá que dar toda a información, non é so dar a información como se a minería por si fora boa e sen destacar para nada os efectos que ten. Opina o sr. Fernández que a moción, que sabe que foi feita a última hora, inclúe catro puntos e cree que debería incluír un máis no senso de que cando se ve a proposta do plan de restauración da Casalonga e cando se mira a normativa na que se basea esta empresa vese que é o Real Decreto 105/2008, do 1 de febreiro, polo que se regula a produción e xestión de residuos de construción e demolición e o Real Decreto 975/2009, de 12 de xuño, sobre xestión de residuos das industrias extractivas e de protección e rehabilitación do espazos afectados por actividades mineiras, polo que estes Reais Decreto son os que permiten que se faga un vertedoiro, tel e como expresa a empresa.

Sinala o sr. Fernández que o BNG tamén reclama que se poña de manifesto que hai unha normativa estatal que permite que se cole un vertedoiro, ademais da normativa autonómica, citada na propia moción. Salaria o sr. Fernández a necesidade de que se modifique a normativa estatal, que é a que permite que a Teo lle colen un vertedoiro, polo que sería interesante a referencia á normativa estatal citada.

Sinala que así mesmo, cando se enfrontan a un problema como o que se enfrontan, especialmente o do vertedoiro, non tanto o da planta de residuos, tamén hai que informar á veciñanza sen manipulacións e sen interpretacións sesgadas e as veces interesadas sobre cal é a competencia de cada Administración, porque iso non foi feito nese senso, a efectos tamén do que fai a Cámara mineira porque intenta colar unha campaña publicitaria poñendo a parte boa da minería, sen poñer a mala, co cal está manipulando. Considera o sr. Fernández que tamén o Concello debe tamén dar toda a información sen manipulacións e sen interpretacións sesgadas en función de cómo lle

vai a cada un e cal sexa a posición de cada un. Remata o sr. Fernández reclamando que se informe á opinión pública como corresponde.

Intervén a portavoz do PSdeG-PSOE, sra. Lemus, e di que non ten ningún problema coa proposta do sr. Fernández sobre os cambios legislativos en Madrid.

Tratándose da campaña ao alumnado sobre a minería sostible, opina que como tal Cámara oficial, semifinanciada en parte pola Xunta, lle chama atención que a Xunta se meta neste fregado, engadindo que non lle parece nin lóxico nin coherente. Salienta que a campaña é digna de ver, é sexista, e utiliza unha mineira que se chama Bárbara que a medida que avanza a idade do público obxectivo se cingue bastante máis, o que ten que ver con outro mundo como o da cosificación da muller e ten tamén elementos como que recolle a posibilidade de restauración e de actividades de ocio en zonas restauradas como actividades sostibles, e aparece unha moto de auga. Opina a sra. Lemus que é o culmen da barbaridade publicitaria, sexista, manipuladora e falsa.

Remata a sra. Lemus a súa intervención sinalando que agradece a rápida reacción das Ampas en manifestar o seu rexeitamento a esta campaña, e entende que se a Xunta de Galicia ten dous dedos de fronte lle dirá á Cámara que se quere facer campañas destas as fagan eles sen utilizar nin medios nin fondos públicos.

O portavoz do PP, sr. Guerra, non fai uso da súa quenda de intervención.

Tras un breve intercambio de opinións, a emenda proposta polo concelleiro do grupo mixto, sr. Fernández, concrétase na incorporación dun punto catro, co tenor literal que se detalla de seguindo, pasando o actual punto cuarto a ser o quinto.

Emenda proposta polo sr. Fernández:

*“Solicitar ao goberno do Estado a modificación da normativa estatal (R.D. 975/2009, do 12 de xuño, e R.D. 105/2008, do 1 de febreiro) que son utilizados de forma fraudulenta para a instalación de vertedoiros encubertos a través do mecanismo dos plans de restauración”.*

Interveño eu, secretaria da Corporación, para lembrar que as emendas teñen que formularse por escrito presentado ao presidente antes de comezarse a deliberación do asunto e, no caso de formularse emendas *in voce* durante a sesión, unicamente poderá aceptarse o seu debate por acordo da maioría dos asistentes.

Os/as concelleiros/as non fan uso da segunda quenda de intervencións.

O sr. alcalde di que se lle esqueceu antes e desculpa a ausencia do sr. Francos, que está de viaxe.

O sr. alcalde explica que se vai a proceder en primeiro lugar a votar a emenda formulada polo sr. Fernández, anteriormente transcrita.

**Sometida a votación, o Pleno da Corporación, por unanimidade dos presentes (6 Son de Teo-ANOVA, 7 PP, 2 PSdeG-PSOE e 1 grupo mixto), acorda aprobar a emenda formulada polo sr. Fernández ao ditame da moción conxunta de ANOVA-Son de Teo, PSdeG-PSOE e BNG para o rexeitamento da campaña dirixida ao alumnado sobre a minería sostible.**

De acordo co resultado da votación, o sr. alcalde sinala que se vai a someter a votación o ditame da moción conxunta de Son de Teo-Anova, PSdeG-PSOE e BNG, emendada polo sr. Fernández.

**Sometido a votación o ditame emendado, o Pleno da Corporación, por unanimidade dos presentes (6 Son de Teo-ANOVA, 7 PP, 2 PSdeG-PSOE e 1 grupo mixto), acorda:**

- **Reclamar da Xunta de Galicia e da Cámara Oficial da Minería de Galicia que retiren a campaña de distribución, nos centros escolares de infantil, primaria e secundaria, dos materiais didácticos denominados “Minería Sostible de Galicia”, por tratarse dunha campaña publicitaria con información incompleta, sesgada e terxiversada.**
- **Reclamar da Xunta de Galicia que examine as explotacións mineiras**

abandonadas para coñecer os problemas medioambientais que están a producir, e se elabore un plan para poñerlles remedio.

- **Esixir a Xunta de Galicia que sexa eficaz na súa labor de inspección medioambiental nas explotacións mineiras, e se establezan os controis necesarios para atallar a contaminación en todas as fases do proceso extractivo.**
- **Solicitar ao goberno do Estado a modificación da normativa estatal (R.D. 975/2009, do 12 de xuño, e R.D. 105/2008, do 1 de febreiro) que son utilizados de forma fraudulenta para a instalación de vertedoiros encubertos a través do mecanismo dos plans de restauración.**
- **Comunicarlle a Xunta de Galicia, á Cámara oficial da minería de Galicia, e os centros escolares de Teo o contido desta moción.**

## **6.- PROPOSICIÓN DA ALCALDÍA SOBRE A OBRA COLECTOR ESPASANDE-A INSÚA: APROBACIÓN DE PROXECTO MODIFICADO E DE EXPEDIENTE DE MODIFICACIÓN DO CONTRATO.**

O sr. alcalde lembra que, ao tratarse dun asunto que non foi ditaminado pola correspondente comisión informativa, por imposibilidade técnica de telo a tempo, procede ratificar a súa inclusión na orde do día.

**Sometida a votación, o Pleno da Corporación, por unanimidade dos presentes (6 Son de Teo-ANOVA, 7 PP, 2 PSdeG-PSOE e 1 grupo mixto), acorda ratificar a inclusión do asunto na orde do día, de acordo cos artigos 82.3 e 97.2 do ROF e 31.2 do ROM.**

O sr. alcalde cede a palabra á concelleira de urbanismo, vivenda e sostibilidade, D.<sup>a</sup> Uxía Lemus de la Iglesia.

A sra. Lemus da conta da proposición da alcaldía sobre a obra do Colector Espasande-A Insúa: aprobación de proxecto modificado e de expediente de modificación do contrato, de 22 de febreiro de 2019, que se recolle a continuación.

**“EXPTE: COLECTOR EN ESPASANDE - A ÍNSUA (O-4/2016). MODIFICADO DE PROXECTO.**

**“PROPOSICIÓN DA ALCALDÍA**

Vistas as Bases do Plan de aforro e investimento (PAI) 2016 da Deputación Provincial da Coruña.

Visto o proxecto de obra redactado polo enxeñeiro de camiños, canles e portos don Xaquín Beiroa Raposo, cun orzamento de execución por contrata de 315.346,10 € aprobado por acordo plenario de 15/03/2016 e modificado polas Resolucións da alcaldía de 17 de marzo de 2016 (res. 223/16), ratificada por acordo do pleno de 31/03/2016 e de 26 de abril de 2016 (res.321/16), ratificada por acordo do pleno de 28/04/2016.

Visto o expediente de contratación O-4/2017, no que figura, entre outros, a Resolución 735/17 de adxudicación a favor da empresa Obras y Viales de Galicia, S.L., de data 08/09/2017, a formalización do contrato de data 21 de setembro de 2017 e a acta de comprobación do reformulo previo de data 16 de outubro de 2017.

Visto o proxecto modificado nº1 Colector Espasande – A Ínsua , redactado polo enxeñeiro de camiños, canles e portos don Xaquín Beiroa Raposo, que tivo entrada neste concello en data 13 de febreiro de 2019 con número de rexistro 1026.

Vistos o informe da Secretaría adxunta, o informe de Intervención e o informe técnico que constan no expediente, e considerando a conformidade dada polo contratista á modificación a través do trámite de audiencia que lle foi outorgado, PROPONSE AO PLENO a adopción do seguinte acordo:

**Primeiro**.- Aprobar o “proxecto modificado nº1 Colector Espasande – A Ínsua”, redactado polo enxeñeiro de camiños, canles e portos don Xaquín Beiroa Raposo, que tivo entrada neste concello en data 13 de febreiro de 2019 con número de rexistro 1026.

**Segundo**.- Aprobar o expediente de modificación do contrato de obra para a execución do colector en Espasande – A Ínsua (Expte. O-4/2016), e proceder, no seu caso, á formalización da modificación pretendida.

**Terceiro**.- Dar traslado do acordo á empresa contratista e á Deputación da Coruña a efectos das actuacións que sexan pertinentes.

Teo, 22 de febreiro de 2019  
O alcalde

Rafael C. Sisto Edreira”

A sra. Lemus sinala que hai cinco modificacións no proxecto e procede a explicalas. Sinala que a primeira delas refírese a que na estrada da Deputación había uns pozos tapados e no último non se podía ver a cota, polo que houbo que modificar un pouco o trazado para dar con esa cota. Refírese a sra. Lemus á segunda modificación referida a un cambio de trazado para que a senda vaia pola zona do río, que é o lóxico, coa creación dun muro de escollera para a baixada xusto na zona de Luou. Sinala a sra. Lemus que a terceira modificación ten que ver coa existencia de canles aparecidos unha vez comezada a obra, debido ao estado de abandono da zona. A cuarta modificación refírese a que, no cruce do Rego-Sestelo, por imposibilidade técnica, houbo que cambiar de marxe, e este cambio de marxe nos leva a unha punto quinto referido ao cambio de marxe no tramo final porque así se evitaba un cambio custoso co obxectivo de que o modificado fora a custo cero.

Salienta a sra. Lemus que obran no expediente todos os informes.

Aberta a primeira quenda de intervencións, o portavoz do grupo mixto, sr. Fernández, amosa a súa conformidade, engadindo que en todo caso plantexara algunha cousa en rogos e preguntas.

Intervén o portavoz do PP, sr. Guerra, quen lle cede a palabra ao concelleiro do seu grupo D. Antonio Reyes Sánchez Crespo.

O sr. Sánchez explica que esta semana estivo co arquitecto municipal vendo con detalle as modificación e salienta que son máis de carácter técnico e incluso nalgúns casos evitan que a senda pase por medio da horta dun veciño, o que provocaba certo malestar, e a eliminación desta ponte, que era custosa. Anuncia o sr. Sánchez o apoio do seu grupo.

Entende o sr. Sánchez que todas as obras levan tempo, e que existiron diferentes atrancos, porén foi unha obra que se aprobou en marzo de 2016, polo que lle gustaría que se recopularan un pouco as causas da continua demora desta obra que tiña un prazo de execución de catro ou seis meses.

O sr. alcalde di que sen quitar razón ao exposto polo sr. Sánchez, hai que ter en conta que a obra se licitou o verán pasado e se iniciou en outono de 2017, traballaron dous meses e xa xurdiron os problemas.

Preguntado polos sr. alcalde, os/as concelleiros/as non fan uso da segunda quenda de intervencións.

**Rematado o debate e sometido o asunto a votación, o Pleno da Corporación, por unanimidade dos presentes (6 Son de Teo-ANOVA, 7 PP, 2 PSdeG-PSOE e 1 grupo mixto), acorda:**

**Primeiro**.- Aprobar o “proxecto modificado nº1 Colector Espasande – A Ínsua”, redactado polo enxeñeiro de camiños, canles e portos don Xaquín Beiroa Raposo, que tivo entrada neste concello en data 13 de febreiro de 2019 con número de rexistro 1026.

**Segundo**.- Aprobar o expediente de modificación do contrato de obra para a execución do colector en Espasande – A Ínsua (Expte. O-4/2016), e proceder, no seu caso, á formalización da modificación pretendida.

**Terceiro**.- Dar traslado do acordo á empresa contratista e á Deputación da Coruña a efectos das actuacións que sexan pertinentes.

## **7.- MOCIÓNS.**

Antes de entrar no punto oitavo da orde do día relativo a rogos e preguntas, o sr. alcalde, de conformidade co previsto no artigo 91.4 do R.D. 2568/1986, de 28 de novembro, e no artigo 33 do Regulamento orgánico, pregunta se algún grupo municipal quere presentar algunha moción de urxencia, sen que se presente ningunha polos grupos municipais.

## **8.- ROGOS E PREGUNTAS.**

### **ROGOS E PREGUNTAS FORMULADOS POLO GRUPO MIXTO.**

O concelleiro do grupo mixto, sr. Fernández, formula os/as seguintes rogos e preguntas:

1.- Sinala o sr. Fernández que, retomando o tema do colector, no Pleno pasado plantexou o tema do acceso aos muíños e aclara que agora sabe cales son porque estivo alí. Sinala que hai un de pedra, que máis ou menos está a nivel, porén a partir de aí hai dous que quedan moi abaixo. Entende o sr. Fernández que, tal e como dixo o sr. alcalde no Pleno anterior, se vai a facilitar o acceso.

O sr. alcalde di que se trata de non dificultar o acceso que tiñan, aínda que tampouco se vai a mellorar, intentándose que quede para que poidan ir a moer. Salia que dos que hai é o único que moe, polo que se non é a través do proxecto, será a través dunha actuación municipal directa.

Di o sr. Fernández que o trazado actual vai polo medio e medio dunha finca, non sorteia ao muíño, senón que vai pegado á canle. Pregunta se iso queda así.

O sr. alcalde sinala que existiu un acordo co veciño, e foi o que se cambio o acceso, porque nun primeiro momento o acceso era pola pista asfaltada que vai por diante dunha casa xusto ao pasar a ponte de chancla a man dereita e baixaba polo linde dunha finca cara o río. Iso era molesto, o veciño fixo a petición, e se prolongou pola a beira do río, o que leva á construción dunha baixada de escaleiras de madeira dende a ponte para acceder á beira do río xa directamente.

O sr. Fernández di que alí existe unha canle que se ve que está feita de fai pouco, vese que está a terra movida, porén parece que a canle viña doutro lado, que a auga viña por riba.

O sr. alcalde di que, como en todos os ríos, se fai unha derivación de río bastante antes, se vai separando do río, gañando menos profundidade que o propio río para crear ese desnivel, porén a canle ven do propio río.

O sr Fernández di que agora mesmo si.



O sr. alcalde di que agora e sempre.

Pregunta o sr. Fernández se esa canle estivo sempre, engadindo que lle chocaba ver que esa finca estivera dividida en dous.

O sr. alcalde explica que no outro muíño que hai na mesma man, precisamente onde está o muro de pedra ese grande que lles obrigou a cambiar para outro lado, ese muro o que fai é separar onde embalsa, e mentres dura esa canle, que vai a facer mover o muíño, se separa da beira do río necesariamente. Aclara que en todo caso iso está falado e acordado con eles sen ningún problema.

2.- Refírese o sr. Fernández á zona do Pedrouso, en Augas Mansas, e di que a pista que baixa ata á estrada da Deputación, acábase de bachear, porén é unha reclamación veciñal xa case que histórica, que se asfalte, porque se bachea pero aparecen boquetes.

O sr. alcalde resposta que antes das eleccións non existe previsión, aínda que coinciden coa valoración do sr. Fernández, polo que o que estea terá que facelo nun prazo razoable.

### **ROGOS E PREGUNTAS FORMULADOS POLO PSdeG-PSOE.**

O/a concelleiro/a do PSdeG-PSOE non formulan ningún rogo nin pregunta.

### **ROGOS E PREGUNTAS FORMULADOS POLO PP.**

O portavoz do PP, sr. Guerra, formula os/as seguintes rogos e preguntas:

1.- O sr. Guerra pregunta se en Cerdeira-Vilariño se van a cambiar as luces.

2.- Di o sr. Guerra que hai veciños que se queixan de exceso de luces nos xardíns das rotondas porque provoca confusión coas luces dos coches.

A sra. Lemus explica que as que estaban dando máis problemas eran as da rotonda de Florida, que se apagaron. Explica que teñen telexestión, e cando entre esta se van a poder baixar, entre tanto se apagaron porque producían deslumbramentos e despois mirárase de baixar a intensidade.

3.- Di o sr. Guerra que en Lamas existía un pequeno parque, que se eliminou, e agora hai doce rapaces polo menos e queren que se lles poña un parque.

O sr. Iglesias explica que o outro día na reunión da asemblea de veciños de Bamonde saíu este tema e acordaron que no espazo destinado a parque se van a instalar unhas mesas e uns bancos de pícnic. Explica que o parque se sacou porque non cumpría as normas e habería que instalar un parque con caucho, con vallas, etc, nun espazo onde hai dous parques perfectamente instalados na parroquia. Sinala o sr. Iglesias que as mesas e os bancos xa están encargados.

O sr. Guerra di que, ante a falta de recuperar o parque, os nenos piden que se poña un skatepark.

O sr. Guerra lémbrale ao sr. Iglesias que onde o Che hai un parque arriba e abaixo fíxose outro, xa que Baamonde ten tres aldeas, Lamas, Trivalde e O Coto, Lamas tiña un parque, quitouse, e debía volver a poñerse.

O sr. Sisto di que o de arriba sacouse, engadindo que en todo caso se mirará.

E non habendo máis asuntos que tratar, sendo as vinte horas e corenta e cinco minutos, de orde da Presidencia, levántase a sesión, da que se estende a presente acta, do que eu, secretaria, dou fe.

O alcalde

A secretaria

Rafael C. Sisto Edreira

Virginia Fraga Díaz